

欽  
定  
全  
唐  
文

欽定全唐文卷五百九十三目錄

柳宗元 二十五

舜廟祈晴文

雷塘禱雨文

禡牙文

祭纛文

祭井文

崇門文

祭六伯母文

祭獨孤氏丈母文

祭從兄文

祭弟宗直文

祭姊夫崔使君簡文

又祭崔簡旅櫬歸上都文

祭崔氏外甥文

祭崔氏外甥女文

祭外甥崔駢文

祭楊憑詹事文

祭穆質給事文

祭呂衡州溫文

祭李中丞文

爲韋京兆祭杜河中文

爲韋京兆祭太常崔少卿文

爲李京兆祭楊凝郎中文

爲安南楊侍御祭張都護文

祭萬年裴令文

祭呂敬叔文

祭崔君敏文

祭段宏古文

祭李中明文

哭張後餘辭

并序

楊氏子承之哀辭

并序

欽定全唐文卷五百九十三

柳宗元 二十五

舜廟祈晴文

年月日某官某敢用牲牢之奠昭祭於虞帝之神帝入大  
麓雷雨不迷帝在璿璣七政以齊九澤旣陂錫禹元圭至  
德神化後誰與稽勤事南巡祀典以躋此焉告終宜福遺  
黎廟貌如在精誠不睽今陽德愆候有滄淒淒降是水潦  
混爲塗泥岸有善崩流或斷隄泛濫疇隴陂陀圃畦恆雨  
獲戾循咎增悽忍茲嘉生均彼蓬藜敢望誅黑蜥扶陰蜺

式乾后土以廓天倪粢盛不害餘糧可棲或簸或洩爲酒  
爲醢鎗鎗笙鏞坎坎鼓鼙百代祀德吐心不攜豈獨蘋藻  
徵諸澗溪帝其聽之無作神羞

雷塘禱雨文

惟神之居爲坎爲雷專此二象宅於巖隈風馬雲車肅焉  
徘徊能澤地產以祛人災欽茲有靈爰以廟饗神惟智知  
我以誠往苟失其應人將安仰歲旣旱暵害茲生長敢用  
昭告期於盼蠻某自朝受命臨茲裔壤莅政方初庶無淫  
枉廉潔自持忠信是仗苟有獲戾神其可罔擢擢嘉生惟

天之養豈使桀盛夷於草莽騰波通氣出地奮響欽若成  
功惟神是獎

禡牙文

維年月日某官某以清酌少牢之奠禡於軍牙之神秦定  
百越漢開九郡自茲編列同於諸華天寶兆亂北方薦役  
惟是南方久稽討伐藩蠻怙險乳字生聚悖傲威命虐夷  
齊人黃姓陋孽實恣盜暴僮壯殺老掠斂使臣梟視洞窟  
以逃大戮今皇帝受天景命敷於有仁凡百凶毒罔不震  
伐齊魯剽殄趙魏顯化溥天之下咸順帝理唯是瑣眇尚



恣昏頑致天震怒命底於罰官臣某欽率邦典統戎於征  
惟爾有神懋揚迺職敢告無縱詭類無劉我徒鏃刃鋒鏑  
畢集於凶躬鎧甲干盾咸完於義軀焚煬蕩沃往如行虛  
俾人懷於安以靖離之隅在是舉也往欽哉無作神羞急  
急如律令

祭纛文

維年月日某官以牲牢之奠祭於纛神惟昔灋有大特化  
爲巨梓秦人憑神乃建葺頭是爲兵主用以行師漢宗蚩  
尤亦作靈旗旣類旣禡指於有罪北面詔盟抗侯以射雖

有古典今棄不用惟茲之制神實守祀有蠢黃孽保固虐人俾茲太平猶用戎律天子有命威施於下惟守臣某董眾撫師秉羽先刃出用茲日敢修外事爰薦求牛庶無畱行以殄有罪國有祀典屬於神明傷夷大命無敢私顧惟克勝敵以全天兵去茲蝨蠃達我涵育收厥隸圉役於校人海隅黎獻永底於理無或頓刃以爲神恥急急如律令

祭井文

致祭於水土之神惟神蓄是元德演爲人用不窮之養功齊乳潼惟古有制八家所共是邦闕焉官守斯恐蘊利滋

久閔靈則深爰告有神惟惻我心卜茲利兆於彼城陰神  
斯有仁是鑒是臨惟昔善崩今則堅好惟昔匝石今則順  
道終古所無聿從心禱非神是與人力焉保發自元冥成  
於富媪克長厥靈不愛其寶敬修報禮式薦蘋藻

崇門文

崇於城門之神惟神配陰含德司其翕關能收水沴以祐  
成績淫雨斯降害於蕤麥野夫興憂官守增惕諸陰既閉  
休徵未獲敬用瓢齊以展周索納其雲氣復我川澤惟神  
是依式佇來格

祭六伯母文

維貞元十七年歲次辛巳二月癸巳朔二十五日丁巳姪男華州華陰縣主簿纁謹以清酌庶羞之奠敬祭於六伯母之靈伏惟天錫考壽神資淑德高明而和柔惠且直敬長慈幼宗姻仰則不偕貴位孰不悽惻嗚呼哀哉移天夙喪丁此閔凶主器繼天莫承於宗懿彼賢女孝誠自中溫溫良人竟揚德風承順必敬滑甘則豐致養有榮其道克終天禍弊族遠承哀訃纏牽官事奔哭無路亦旣請告聿來京師以號以呼祇拜堂帷子姓凋落宗門日衰託於外

姻陳此靈儀幼女號戀誓言固之仁賢見容曲遂其私內  
顧孱眇祇益推悲誠愧於人豈曰得宜今歲調選獲參士  
林主其簿書於華之陰受祿雖微莫遂曩心夙駕東征祖  
輟將臨朔望是違哀懷豈任嗚呼哀哉

祭獨孤氏丈母文

維年月日某以清酌之奠祭於獨孤氏丈母之靈惟靈育  
德涵仁克生賢子生而不淑未壯而死名播九圍望高羣  
士雖微祿位人羨其美在抱無孫承家乏祀孝女良壻適  
遵燕喜某曩與子重道契義均知心爲貴實在斯人奉養

宜繼將致其勤竟罹禍謫逾紀漂淪夙志斯阻微衷莫申  
冀榮末路私願獲陳遽此承訃天胡不仁嗚呼哀哉昔也  
高堂世悲其獨今茲元室孝道當復神感昭融不疾而速  
靈識逾濬承歡載穆式致其安寧寘其毒願言有知以慰  
幽躅

祭從兄文

嗚呼我姓嬋嫣由古而蕃鐘鼎世紹圭茅並分至於有國  
爵列加尊聯事尚書十有八人中遭諸武抑遏讎冤踣弊  
不振數逾百年近者紛紛稍出能賢族屬旂耀期復於前

君修其辭楚越猶傳從事諸侯假乎郡藩人謠吏畏威惠  
咸宣神胡不佑命不能延興起之望是越是愆歲首去我  
將濱海壘畱連歡娛涉月彌旬夜熬膏炬晝淩風烟理策  
嶇嶇縻舟潺湲將辭又醉就往而旋今者之來徒御淒然  
垂帷襜褕飛旒翻翻升拜無形合哭誰聞逝歸從祔於鄧  
之原銘墓有辭發我狂言祇陳其悲匪暇於文觴有旨酒  
豆有狔肩伊奠之菲而誠孔繁靈耶罔耶有涕漣漣

祭弟宗直文

維年月日八哥以清酌之奠祭於亡弟十郎之靈吾門凋

喪歲月已久但見禍謫未聞昌延使爾有志不得存立延陵已上四房子姓各爲單子慥慥早夭汝又繼終兩房祭祀今已無主吾又未有男子爾曹則雖有如無一門嗣續不絕如綫仁義正直天竟不知理極道乖無所告訴汝生有志氣好善嫉邪勤學成癖攻文致病年纔三十不祿命盡蒼天蒼天豈有真宰如汝德業尚早合出身由吾被謗年深使汝負才自棄志願不就罪非他人死喪之中益復爲媿汝墨法絕代識者尚稀及所著文不令沈沒吾皆收錄以授知音文類之功更亦廣布使傳於世人以慰汝靈



知在永州私有孕婦吾專優恤以俟其期男爲小宗女亦  
當愛延子長大必使有歸撫育教視使如已子吾身未死  
如汝存焉炎荒萬里毒瘴充塞汝已久病來此伴吾到未  
數日自云小差雷塘靈泉言笑如故一寐不覺便爲古人  
茫茫上天豈知此痛郡城之隅佛寺之北飾以殯紼寄於  
高原死生同歸誓不相棄庶幾有靈知我哀懇

祭姊夫崔使君簡文

永州刺史博陵崔公之靈天之生人或哲或愚君取其英  
爰曜於初譽動京邑施於方隅密勿書奏元侯是俞蜀寇

內侮禍聯羌髡君出顯畫披攘其徒南平劒門西獲戎俘  
超受刑曹畱總南都移刺連部下民其蘇道不可常病惑  
中途悍石是餌元精以渝雷謗爰興按驗增誣始雖進律  
終以論辜溟海浩浩而君是踰崇山茫茫而君是居厥弟  
抗憤叫於康衢天子憫焉訊以文書御史旣斥連帥是除  
期復中壤遽淪別區喪還大浸又溺二孤痛毒薦仍振古  
所無何謫於天降此翦屠柩不及歸寓葬荒墟將葺將就  
誓還里閭嗚呼哀哉君之子姓惟自我出母儀先虧父訓  
又失熒熒相值撫悼增恤咸冀其才以大家室惟昔與君

年殊志匹晝咨夕計期正文律實契師友豈伊親昵誰謂  
斯人變易成疾良志莫踐乖離永訣嗚呼哀哉永山之西  
湘水之東殯紼以出斧屋爰封神非久畱息駕於中書石  
爲誌世德斯崇手斟以酌涕出焉窮

又祭崔簡旅櫬歸上都文

嘻乎崔公之柩嘻乎崔公楚之南其土不可以室或坳而  
頽或确而萃陰流泄漏瀦沒滄溢碩鼠大蟻傍穿側出虧  
踈脆薄久乃自窒不如君之鄉式堅且密嘻乎崔公楚之  
南其鬼不可與友躁戾佻險睽睽欺苟胙賤暗習輕嚚妄

走不思已類好是羣醜不如君之鄉式和且偶日月甚良  
子姓甚勤具是舟輦寧君之神去爾夷方返爾故鄰奕奕  
其歸宜樂且欣君死而還我生而畱永矣殊世曷從之遊  
酌觴於座與涕俱流

祭崔氏外甥文

年月日八舅十舅以酒肉之奠敬祭外甥韋六小卿之魂  
嗚呼生有孝姿淑且茂兮謂吉其終道克就兮胡典而喪  
離厥咎兮蹈道而違死誰祐兮豈汝之昧不能究兮將奪  
之鑒使昏瞶兮反復攪予哀何救兮骨肉無從魂焉覲兮

庶幾來歸餽以脩兮酒實於觴肉盈豆兮豈伊異人余所  
授兮來耶否耶歆氣臭兮

祭崔氏外甥女文

叔舅宗元祭於二十六娘子之靈凡我諸甥惟爾爲首甥  
於我氏恩顧彌厚惠明貞淑仁愛孝友女德之全素風斯  
守播於族屬芬馨自久恭惟伯姊道茂行高上承下訓克  
敬能勞夙有儀則刑於汝曹雖云惟性抑自良陶汝之先  
君以文誨我周流辯論有疑必果恆革其非以成其可就  
云其美易以生禍汝及諸弟流離莫從幸獲我依以慰困

窮歸之令族有蔚其容方冀榮壽遽罹災凶嗚呼哀哉汝  
自艱酷二弟繼終海門之哀今古罕同駢也英文敷暢洽  
通實期振耀宏我儒風又茲天闕神理何蒙盛德餘慶宜  
福其豐胡然降戾惟禍之逢嗚呼哀哉前歲詔追廷授遠  
牧武陵便道往來信宿幸茲再見緩我心曲猶且輕別瞻  
程務速孰知自此遂間幽躅臨視無路遡風慟哭怛焉自  
中如刃之觸卽阜有位青烏載卜道途尚艱歲月逾蹙方  
俟歸紉再期奠沃寄哀斯文心焉往復嗚呼哀哉

祭外甥崔駢文

祭於卿郎之魂嗚呼天恡靈奇取不可貪旣審又力神誰  
以堪汝不是思而縱其志盜其管籥褰其篋匱抽深挾密  
擔重揭貴守吏失職訴帝行事果殄爾躬以寧其位豈不  
信耶不然無鬼誅之行而中道夭死有拔萃之才而三見  
廢委仁充其軀毒中骨髓其何以爲累也兄弟逾十我出  
惟八旣孤數祀中分存沒我爲汝舅汝爲我甥求仁具得  
爲藝繼成天下莫倫古罕並行人而思之幾不欲生嗚呼  
哀哉旣致其愛祇極其哀秦越萬里神魂徘徊念與汝別  
恒公之臺顧余猶壯視爾如孩戲抽佛筴前次淹隈笑頷

卽路鳴鞘不迴豈云古今自此而乖孰爲鬼神忍是陰誅  
得疾之日兄弟莫在謁醫問巫卒以幽昧葬之東野誰賈  
誰會旣虞以奠誰主誰醑孤魂冥冥何託何逝嗚呼哀哉  
刑曹繼之以病告余銜憂驅使裹藥操書雖驚狀劇猶恃  
神扶豈知所賴終以誤吾我自得罪無望還都想爾新墓  
少陵之隅何時歸祔圯土下呼漬淚徹壙以沾以塗此心  
未慊祇益摧紆累見於夢寧知有無寄之哀辭惟俎及壺  
嗚呼哀哉

祭楊憑詹事文



年月子壻謹以清酌庶羞之奠昭祭於丈人之靈卿雲輪  
囷天漢昭回自然物外寧雜塵埃公稟間氣心靈洞開翺  
翔自得誰屑羣猜孝友忠信聞於九垓摘華發藻其動如  
雷世榮甲科亦矜顯處公之俊德有而不顧御史之選朝  
之所注公勤於養投劾引去時任方隅威刑是務公施其  
惠亦莫有違京兆之難下多怨怒或由以黜瓦石盈路公  
捍其強仁及童孺左遷而出擁道牽慕道峻多謗德優見  
憎煩言旣詆倚法斯繩南過九疑東逾秣陵顛沛三載天  
書乃徵入傳王國嘉聲聿興詹事東宮致政是膺年唯始

至道則彌勵頡頏今古優游德藝實期濬發再光文陛誰  
謂昊天遽茲降厲嗚呼哀哉某以通家承德夙奉良姻莫  
成子姓早喪淑人恩禮斯重眷撫惟新綢繆其志實敬實  
勤迨今挈然十有八祀家缺主婦身遷萬里謗言未明黜  
伏逾紀德輝間絕音塵莫俟歲首發函視遠如邇雖當沈  
痼心術猶治撫膺頓首流泣瞪視旣斂而還莫傳音旨鄉  
風長慟於茲已矣嗚呼哀哉承訃之始卜兆旣逾載馳斯  
文出拜路隅哀從海澨禮致皇都寸誠相續終歲不渝天  
道悠遠人世多虞寄心雙表長恨囚拘嗚呼哀哉

祭穆質給事文

昭祭於給事五丈之靈自古直道鮮不顛危禍之重輕則  
繫盛衰矯矯明靈克丁聖時形軀獲宥三黜無虧賢良發  
策始振其儀天子動容敬我直辭載之冊府命以諫司抗  
奸替否與正爲期奏書百上知無不爲誰謂劉賈英風莫  
追給事黃門奉職樞機封還付外動獲其宜無曠爾位惟  
公在斯達道之行實惟交友患難相死其廢日久公實毅  
然誓均悔咎挺身立氣不改其守黜刺南荒義言盈口封  
章致命志期殞首邈矣高標誰嗣於後王命南下郡符東

剖流滯湮淪殲此遐壽嗚呼哀哉公之伯仲信惟先執感  
激之風道同義立中司守直奸權是襲致之徽纆誣以賄  
入瑣瑣其徒榜訊愈急詔下三司議於洛邑噫我先君邦  
憲是輯平反羣枉大忤三緝危法旋加譖言俄及左官夔  
國義夫掩泣邪臣既黜乃進其級端於庶僚直聲允集虔  
虔小子夙奉遺則公在郎位再罹擯抑時忝憲司竊分枉  
直抗辭犯長有志無力惟韓洎劉同憤霑臆道之不行銜  
媿罔極公在左掖議登秋官先定於志將發其難決白無  
狀以申禍端秉心撰詞義不可干會逢友累曾莫自安感

於褚中有涕沈瀾嗚呼哀哉壽官久翳狼荒萬里禮不可  
違誠不可弭抽哀洩憤舒文致美願遡海風以窮洛涘清  
明如在神鑒何已嗚呼格思以慰勤止

祭呂衡州溫文

維元和六年歲次辛卯九月癸巳朔某日友人守永州司  
馬員外置同正員柳宗元謹遣書吏同曹家人襄兒奉清  
酌庶羞之奠敬祭於呂八兄化光之靈嗚呼天乎君子何  
厲天實仇之生人何罪天實讎之聰明正直行爲君子天  
則必速其死道德仁義志存生人天則必天其身吾固知

蒼蒼之無信漠漠之無神今於化光之歿悲逾深而毒逾甚故復呼天以云云天乎痛哉堯舜之道至大以簡仲尼之文至幽以默千載紛爭或失或得倬乎吾兄獨取其直貫於化始與道咸極推而下之法度不忒旁而肆之中和允塞道大藝備斯爲全德而官止刺一州年不逾四十佐王之志沒而不立豈非修正直以召災好仁義以速咎者耶宗元幼雖好學晚未聞道洎乎獲友君子乃知適於中庸削去邪雜顯陳直正爲道不謬兄實使然嗚呼積乎中不必施於外裕乎古不必諧於今二事相兼從古至少至

於化光最爲太甚理行第一尚非所長文章過人略而不  
有夙志所蓄巍然可知貪愚皆貴險狠皆老則化光之天  
厄反不榮歟所慟者志不得行功不得施蚩蚩之民不被  
化光之德庸庸之俗不知化光之心斯言一出內若焚裂  
海內甚廣知音幾人自友朋凋喪志業殆絕惟望化光伸  
其宏略震耀昌大興行於時使斯人徒知我所立今復往  
矣吾道息矣雖其存者志亦死矣臨江大哭萬事已矣窮  
天之英貫古之識一朝去此終復何適嗚呼化光今何爲  
乎止乎行乎昧乎明乎豈蕩爲太空與化無窮乎將結爲

光耀以助臨照乎豈爲雨爲露以澤下土乎將爲雷爲霆  
以泄怨怒乎豈爲鳳爲麟爲景星爲卿雲以寓其神乎將  
爲金爲錫爲圭爲璧以栖其魄乎豈復爲賢人以續其志  
乎將奮爲神明以遂其義乎不然是昭昭者其得已乎其  
不得已乎抑有知乎其無知乎彼且有知其可使吾知之  
乎幽明茫然一慟腸絕嗚呼化光庶或聽之

祭李中丞文

維貞元二十年歲次甲申五月某朔二十二日故吏儒林  
郎守侍御史王播將仕郎守殿中侍御史穆質奉議郎行



殿中侍御史馮邈承奉郎守監察御史韓泰宣德郎行監  
察御史范傳正文林郎守監察御史劉禹錫承務郎監察  
御史裏行柳宗元承務郎監察御史裏行李程等謹以清  
酌之奠敬祭於故中丞贈刑部侍郎李公之靈惟公堅貞  
守道潔廉成德當官秉彝卓爾孤直高節外峻純誠內植  
臨事不回執心無惑矯矯勁質擢於天枝式是邦族粲其  
羽儀發跡內史參其軍事自下廟上直詞屢至於後受邑  
厯撫疲人公去逾久人滋味呻復從京邑辟署司錄振其  
綱條端我甸服黠吏屏氣貪官窒慾赫赫有命登於王庭

邦賦以修國用是經實抗其長以奉準程校其簿書無失  
奇贏進爲正郎勾會是專乃刺於商虎節登山化壻爲沃  
致夷於艱道途謳歌有詔徵還丞我御史執其憲矩糾逖  
之志直清是舉慎擇寮吏必薪之楚終始七載不忘祇勤  
事無觀瞻道有屈伸阜囊密啟忠懇屢陳令望逾重名卿  
是屬拖紳遽聞卷衣已復禮備賄贈恩加命服窳窳有時  
歲月逾感播等猥備官屬况當薦延承其規模奉以周旋  
近或逾月遠則累年咸承至公官守獲全故事盡在遺風  
藹然俯仰庭除顧慕潺湲致誠一觴拜訣堂筵嗚呼哀哉

爲韋京兆祭杜河中文

維年月日甲子京兆尹韋夏卿謹以清酌之奠敬祭於故  
河中節度贈禮部尚書杜公之靈自古謀帥恆在諸儒晉  
登郤縠亦以詩書爰及近代二柄殊途授鉞之臣率由武  
夫時惟明靈道冠學徒天子有命總其戎車何以邦之維  
絳及蒲有山有河殿此大都焜耀昌時振宣後學命服之  
盛光於列岳謂保豐福永縻王爵壽如何期神不可度嗚  
呼哀哉大厯之歲詔徵茂才時忝同道俱起草萊懷策旣  
陳綸言煥開考第居甲自天昭回分命邦畿步武獲陪同

志爲友星霜屢迴長我十年禮宜兄事周游歡洽莫不如  
志於後多幸謬列周行又同制書並命文昌及余稍遷吏  
部爲郎公屬中兵此焉分行再獲聯事東西相望出處同  
道樂惟其常後予出刺九載南服公自左輔遂膺推轂我  
勤魏闕爰總九流誰謂河廣願言莫由烹魚之問往復相  
酬惠好斯厚惟以綢繆余弟宗卿獲庇仁宇命佐廉問忘  
其愚魯假以羽翼俾之騫翥惠文戔戔赤紱在股榮映斯  
極從容何補承慶惟深報恩無所嗚呼哀哉天子震悼哀  
我良臣密印追贈尚書禮殷四方興嗟况此故人循念平

昔徘徊悲辛卜葬斯及禮儀畢陳敬薦行潦洩哀茲辰嗚呼哀哉

爲韋京兆祭太常崔少卿文

維年月日甲子京兆尹韋夏卿謹以清酌庶羞之奠敬祭於亡友故太常少卿崔君之靈惟靈率是良志蹈其吉德炳蔚文彩周流學殖孔氏之訓專其傳釋黃老之言探乎幽蹟六書奧祕是究是索叩爾元關係其真宅藝成行備披雲騁跡康莊未窮濛汜已極嗚呼哀哉夙歲同道從容洛師接袂交襟以遨以嬉策駕嵩少泝舟灇伊笑咏周星

其樂熙熙丹霄可望青雲可期洛中十友談者榮之惟鄭  
洎齊各登鼎司或喪或存山川是連繫我夫子宜相清時  
命之不遐孰不悽悲嗚呼哀哉往佐居守及爾同僚笑遨  
交歡匪夕則朝入同其室出聯其鑣投文報章既歌且謠  
及我爲郎優游吏部公爲御史持憲天路文陞徐趨眷戀  
相顧歡愛之分有加於素自我於邁厯刺東吳離憂十年  
復會名都余爲侍郎銓總攸居實得茂彥奉其規模聯事  
合情又倍其初我尹京兆公亞奉常步武相望佩玉以鏘  
謂保愉樂長此翱翔抱疾幾何忽焉其亡嗚呼痛哉原念

往昔愛均骨肉我有書笥盈君尺牘寤言在耳今古何速  
失涕興哀匍匐往哭撫筵一呼心焉摧剝日月逾邁佳城  
遽卜素車千里逶迤山谷晦爾精靈藏之斧屋嗚呼哀哉  
丹旌卽路祖奠在庭去此昭昭就爾冥冥敬陳泂酌以告  
明靈臨觴永痛庶寫哀忱嗚呼哀哉伏維尚饗

爲李京兆祭楊凝郎中文

維貞元十九年歲次癸未四月辛未朔某日檢校工部尚  
書京兆尹司農卿李實謹以清酌庶羞之奠敬祭於故兵  
部郎中楊公之靈惟靈清標霜潔馨德蘭薰冲和茂著孝

友彰聞濬發洪緒激揚清芬思侔德祖學紹子雲瑩彼靈  
府彬其英文吐論冠時舒華軼羣百氏之奧一言可分旁  
貫釋老豈伊典墳謂躡公相贊揚聖君高山安仰逝水沍  
沍嗚呼哀哉惟是伯仲並爲士則連擢首科迭居顯職公  
之懿美發自朋僚播於四方令聞克昭炯然燭識卓爾孤  
標翼翼其容羽儀清朝載筆東掖動無不紀起草南宮時  
論增美大梁有艱天子是使密勿之謀唯道是履復歸郎  
署職茲中兵簡稽無撓以考其成英風未攄沈疴遽嬰孰  
云積善降以促齡昔歲江表獲同宴語謬爲好仁不我遐



阻公之元兄復惠德音優游多暇眷眄逾深情言盈耳尺素相尋冀茲競爽焜耀儒林及此彫落祇摧我心嗚呼哀哉遣車就引哀挽先路迅風悽悲頽景幽暮傾都殄瘁揮涕相顧矧茲故人誰任痛慕潢汙一觴詎寫平素尚饗

爲安南楊侍御祭張都護文

維年月日故吏某職官某致祭於故都護御史中丞張公之靈交州之大南極天際禹績無施秦強莫制或賓或叛越自漢世聖唐宣風初鮮寧歲稍臣卉服漸化椎髻卒爲華人流我愷悌士燮之理惟公克繼勤勞遠圖敷贊嘉惠

銅柱南表前功載修空道北出式遏蠻陬梯航連連旌旆  
悠悠輻湊都會皇威以流方荷天寵宜公宜侯聲馳帝鄉  
魄降炎州嗚呼哀哉公昔試吏時推清能公昔乘輅人知  
準繩鰥嫠以安征賦用登柱史稍遷郎曹繼升程功佐理  
海裔斯澄乃紀南方專任是憑禮分五玉恩錫百朋開府  
辟掾羣英攸屬顧茲陋微敢廁甄錄旣受筐篚載加命服  
賜有楚冠用慙多角星言赴命注望帷幄視險如夷瞻程  
非邈伯氏左宦爰滯中途流連隱憂言念涕濡子姓莫在  
使命頓殊兢魂弔影敢廢斯須情畱江徼夢結天隅恩切

有裕義乖從役顧慕長慟展轉增惕膂力猶在中腸屢激  
方俟消憂永期投跡謙德不福法星降災庭懸遽徹駟訃  
爰來撫躬益恨循顧增哀瞻容莫及報德何階輶車北轅  
申奠克諧望拜徒至音塵永乖南州斗酒庶寫幽懷

祭萬年裴令文

惟靈孝友之性實惟天與飾以儒書洽其譽處枵然其量  
廓爾其宇人以義來我以身許褰裳赴急不避寒暑交半  
域中多容鮮拒賢於博奕媚茲讌語或泛或沈兩得其所  
考禮成文墜章克舉展樂承職音官式序旣聯奏復亦圖

筍簾播在奉常永傳儀矩脫略細微傲忽煩言坦然自居  
無顧仇怨卒成官謗莫究禍源坐黜中徙再期騰鶩孰云  
宿憤遽此歸魂嗚呼哀哉世稱姻黨鮮克終吉唯我與君  
久而逾密追惟淑德嬪於君室上順尊卑下歡儔匹致其  
孝敬式是仁卹爰及童孩處心勿失君之仲季茂於文術  
游藝相從操觚散帙顧余蹇劣廁跡奔逸二紀於今交情  
若一屢聞凋缺互見遷黜契濶伶俜分形間質方期末路  
稍追曩日時不我謀於焉斯畢營營衛尉獨守邦秩想其  
永哀淮海蕭索嗚呼哀哉聞疾馳簡其命未返翩其訃書

來自番禺塊守窮荒山夔與居有眉不申有志不舒况逢  
零悴當此囚拘拊膺長慟長慟何如非禮無取沈哀有餘  
嗚呼哀哉

祭呂敬叔文

維年月日朔友人從內兄守永州司馬員外置同正員柳  
宗元敬以酒肉之奠致祭於亡友呂敬叔之魂嗚呼鞠躬  
厯聘或以不荅屠漁乖離夫何克合大或不容小或見遺  
往來逢迎今古參差惟子之中忠勇充之以誠與物退受  
其疵智謀宏長辨論恢奇巖義博大與世異姿何付之器

而躓於時常曰余武王功是期誓者其力以達皇威邊鄙  
不靖俾供與師諸侯順道戎貊咸宜今其歿矣哀志之違  
知之無補世又罕知嗚呼哀哉昔與子游尚疑其志及觀  
其長誠任其事日異其能歲增其智進如川行浩浩而遂  
天乎有亡中道是棄余慎取友惟心之虔周游人間餘二  
十年擯辱非恥升揚非賢一貫於道無四五焉子之我知  
不以事遷言而見信貌阻心傳我黜終世子天於前徒稱  
子志誰信我言與子俱已孰云後先惟子之兄志同義比  
官刺一州四十而死子仕方初百年有幾如何默默去我

金史卷之三十三  
三十一  
遄已有穉之妻有弱之子海孺東周號哭萬里葬紉之行  
獲出於此爰陳酒肉式嘉且旨讀茲哀辭以奠而誄嗚呼  
敬叔吾道已矣尚饗

祭崔君敏文

夫產崑崙者難爲玉植鄧林者難爲木公以令望顯於華  
族藝邃六書學該七錄耽此黃老恬於寵辱入補黑衣出  
參甸服紀綱淮海政令惟肅宰治岳濱周於仁育儲闡典  
議直清攸屬久次推能二州繼牧至於是邦率由舊俗和  
易勿亟優游自足既有少吏勤於庶獄妖誣殄除淫祠翦

覆出令三歲人無怨讟進律未行歸神何速某咸以罪戾  
謫茲炎方公垂惠和枯槁以光鳴鑾適野泛鷁沿湘廣筵  
命樂華燭飛觴高歌屢舞終以無荒紛慮斯屏憂懷暫忘  
良時不再斯樂難常今其奈何顧慕感傷嗚呼室有迭去  
川無息流追懷曩辰恍若夢遊冥徹中寢魂遷乘舟邦人  
永思匍匐隱憂况我懷德心焉若抽潔誠可薦蘋藻非羞

祭段宏古文

世病乎直人悅其和行而不容雖聖奈何提其信義誰與  
同波硜硜以終堅不可磨游得其仁友擇其益始如可進



終會於厄精誠介然將貫金石追恩懷舊興詞憤激君昔  
來辱備聞嘉言宵會北堂晝宴南軒去適於越不日其旋  
載除我居望爾北轅今者之來丹旄有翩閼茲英志限此  
中年嗚呼哀哉居實斯貧有子而幼孰云履信惟天所祐  
道途之資敢廢於舊志君之行銘石斯授有潔其觴有楚  
其豆庶鑒於誠臨茲饗侑

祭李中明文

致祭於亡友中明之靈夫子之道邈以恆兮夫子之志勵  
以競兮求中慊末若履冰兮敦仁以孝實烝烝兮唯毀死

外姻解人柳宗元爲之慟且出涕噫是子也氣淳以愿志  
專以勤確然而直方吾未知其止也作辭賦書論其言甚  
偉余方愛之謂可以成器者故不知慟且出涕況其親戚  
者乎凡天之生物也不類精麤紛龐賢愚混同或遠而合  
或親而殊然則雖人親戚亦將有不克知其美者若楊氏  
子者其親戚皆賢咸得知之者也使知之徒以增其悲愁  
怨號之聲無爲也用是爲之辭以相其哀焉

葆醇熙兮承貞則懿文章兮好循直誠耿介兮又綽寬學  
之勤兮行彌專質圭璋兮文虎豹超凌厲兮馳聖道力未

具兮志求通道之遠兮足先窮有母嗷嗷兮有弟哀號世  
父孔悲兮湘水滔滔去昭曠兮沈幽冥魂冥冥兮竟難託  
死者靜兮生者愁子之淑兮徒增憂志甚良兮命甚蹙子  
之生兮又何欲悲吾心兮動吾神誰使子兮淑且仁嗚呼  
已乎不可追終怨苦兮徒何爲

欽定全唐文卷五百九十四目錄

吳仲舒

南風之薰賦

李夷亮

魚在藻賦

南風之薰賦

李方叔

南風之薰賦

賈稜

明水賦

李宗和

平權衡賦

陳佑

平權衡賦

陳左流

進善旌賦

陶拱

天晴景星見賦

虧禮其他莫懲兮秉端守一信厥明兮月踰歲長行若登  
兮外溫其顏內類直繩兮謾言來加不遽陵兮舉世羣非  
自視宏兮庶優游於道大賚是承兮掩冤舒抑與類升兮  
胡茫茫其不信卒以禍仍兮豈韜忠衷信鬼所憎兮將教  
言吾欺終不可徵兮吾方期子於暮冀有興兮今而棄予  
志若崩兮若將援而上喪厥肱兮怛其隕心交背膺兮水  
之綿綿山萬層兮又淫以雨雪紆委礪礪兮鴉鵲夜啼羣  
瞑疑兮魂鬼以行中道殘殍兮魑魅撫呵曷可憑兮聊致  
吾憤斯言孰稱兮

哭張後餘辭 并序

後餘常山張氏孝其家忠其友爲經術甚邃而文少余七年頗弟畜之與之居終日冲然忘其有人與之言鏗爾而厲辨而歸乎中凡人有道而不顯於世則曰非其世也道而得乎世然猶不顯則曰命命之微不可知而知而索乎外者曰性與貌後餘之性可謂良矣其貌可謂肅矣博實宏裕宜爲大官耆老求其所以夭賤無可得焉旣得進士明年疽發髀卒後餘之死人咸痛之曰天之祐善人而殺是子何也激者曰天之殺恆在善人而祐不肖莊周之說以

爲人之君子天之小人張君豈天所謂小人者耶是二者  
又非論之適也吾謂善與惡天與壽貴與賤異道而出者  
也無所喜怒於其中道之出者多其合焉固少是以君子  
之難貴且壽也後餘母老而喪良子東西行者助之哭焉  
況其知者耶然後餘不與諂冒者同貴不與悖亂者同壽  
歸潔乎身聞道而死雖勿哭焉可也嗚呼向更使旣聞道  
而且貴且壽則其顯庸也遠矣又烏能勿痛乎遂哭之以  
辭

嗟嗟張君善不必壽惟道之聞一日爲老人皆反是百稔



猶幼子之優游是亦黃耆嗟嗟張君寵不必貴尊嚴爲仁  
早服高位淫諛肆慾銀艾淪棄子之崇高無媿三事吾見  
皤皤而童赫赫而辱進襦袴於几杖負泥塗於冕服已雖  
有餘人視不足子之跡不混乎其間者幸也宜賀而弔宜  
歌而哭吾其過乎與其寵而加貴善而加壽道施於人慶  
及於母從容邦家樂我朋友豈不光裕顯大歟而不克也  
則弔而哭者其無過乎嗚呼

楊氏子承之哀辭

并序

楊氏子承之旣冠有成人之道其明年四月不幸而夭其

五色比象賦

滅裂禾賦

張復元

太清宮觀紫極舞賦

呂鑄

萬年縣試金馬式賦

玉書賦

鄭俞

性習相近遠賦

關構

日載中賦

徐復

駁李巽擬相國贈尚書右僕射鄭珣瑜諡議

欽定全唐文卷五百九十四

吳仲舒

仲舒貞元五年進士爲雄武軍使張仲武從事

南風之薰賦

以悅人阜財生  
物咸遂爲韻

歌南風之薰兮肇自前烈美凱風以時兮流乎俊哲澹澹  
蕩蕩生乎無閒馥馥微微播於有截故功成作樂而上下  
昭著治定制禮而君臣有別吾亦乘日月之至明致中和  
之令節言而履之萬國稱慶動而法之千寮胥悅此所謂  
規模帝舜慰洽吾人操五絃之琴而八風從律徵三代之

樂而六氣平均使天下霈然而有感窮海外颯爾而知春  
至於傳之永久垂之不朽可以動萌芽可以榮林藪薰風  
之有德也使國富以人安薰風之有惠也使時和而俗阜  
若乃燠佳氣兮允塞埽祥煙兮乍開早綻青門之柳先驚  
上苑之梅晦入陽春之曲潛吹玉管之灰此亦韶年之麗  
景况有順時而豐財或披襟而乍對或臨水而輕拂承長  
養則芳氣襲於一人闡煦嫗則膏露濡於萬物斯以發號  
施令前規後監三農以之協洽兆人以之無咸如此則典  
禮備麟鳳至吾道不樂兮發身有時薰風自南兮萬物咸

遂物本無情因時而生百姓日用而不覺五音歲兆於未  
萌儻高颺之借便順下風而長鳴

### 李夷亮

夷亮宰相夷簡之弟貞元五年進士

魚在藻賦

以潛泳水府形  
諸雅什爲韻

鴻鈞之代兮動植斯慶至德旁流兮潛魚在泳忻藻荇之  
是依美陰陽之克正載頒其首將同宴鎬之觀不脫於泉  
自樂觀濠之性極浦風霽澄潭月虛纖鱗繚繞聚沫紆徐  
或在鮫人之室或過陵鯉之居蓮花東西信可遊而可息

文竿上下徒欲釣而求諸豈不以當在宥之時處恬然之水乘灝灝之元氣得生生之至理大信波及湛恩草靡無慮竭澤之災自保深泉之美伊元風之扇物物無細而不沾惟廣運之鋪時時或與之發潛闕

南風之薰賦

以悅人阜財生  
物咸遂爲韻

時之和兮道之至彼南風兮舒以肆發於地鼓萬物以生成登於天叶三光而能粹豈不以律有度而咸應樂無聲而大備郁郁也從四氣之攸分熙熙然見羣芳之已遂若乃涉維夏背芳晨烝人已乂率土惟淳雲物必書識煙霞

之改舊君臣有禮知動植之懷仁符元化越洪鈞式觀風  
於我后終解慍於吾人伊昔虞帝君臨憂勞是切將納隍  
爲已任垂大訓於前烈援琴寫操知庶政之惟和負宸居  
尊俾舍生之是悅然後澤及幽巖九區克咸氣揚湮鬱四  
海無拂且攸敘於彝倫故無遺於一物國家敬授惟明稽  
古作程式宣其和以厚其生是以東作之勤不遺於帝力  
南風之詠屢起於皇情疊疊多士茫茫萬有猶偃草而咸  
若沐薰風之自久惟德斯碩惟財孔阜

李方叔



方叔德宗朝官侍御史貶江陵掾

南風之薰賦

以悅人阜財生  
物咸遂爲韻

至矣哉如天之君聲明化淳穆南端而作樂播薰風以養  
人順聖時而和則氣無畱慝解吾氓之愠故物無不親所  
以應乎品類遍乎天地感一德而當陽處八方之正位使  
夫微者必翕幽者必遂不以動而有光和而能至風之始  
也日月貞明星辰齊平然後蕩蕩而起熙熙而生觸類而  
煦然長育無朕而潛來備盈行而有孚倚五絃而調四氣  
廣而不費匝九垓而周八紘非比夫抵華葉陵高城轉叢

蕙而渥彩合萬籟而成聲者也風之達也本於元首播於  
羣有使五福富昌萬物殷阜宜其叶無爲之大化匪獨革  
有苗之小醜亦有廣莫北動閭闔東來不如自其南而掩  
器一其薰而阜財則知端拱垂黻化人無拂則必合其君  
資其物豈惟三國不監二叔不咸徒偃其禾而表其讒故  
我君烈烈行道有截歌祖德而庶事用康諧舜樂而鳴琴  
不撤被南風之溥暢慰遠黎之胥悅士有欲搏風於九霄  
希假勢於一挈

賈稜

稜貞元八年進士

明水賦

以元化無宰至  
精感通爲韻

祭祀上潔精誠克宣伊明水之爲用諒至誠以爲先積陰  
以成符嘉應於冥數以鑑而取感無私於上元將假以表  
敬式彰乎告虔皎皎泛月灩灩降天旣稟氣在陰亦成形  
於夜有無雖繫於恍惚融結寧隨於冬夏明者誠也我則  
闇然而彰水惟信焉吾非倏爾而化徒觀其清霄霧斂朗  
月輪孤鑒清瑩而類鏡水滴瀝而疑珠混金波而共潔迷  
玉露而全無感而遂通配陽燧之爲火融而不涸異寒冰

之在壺彼既無情此何有待始同方而合體寧望遠而功  
倍故能佐因心於霜露均潤下於江海有形有實徒加以  
強名無臭無聲孰知其真宰是以昭其儉潔其意含水月  
之淳粹修粢盛於豐備作元酒而禮崇登清廟之誠貴嗤  
潢汙之野薦陋甘醴之莫致祀事孔明其儀旣精無朕而  
有不爲而成二氣相臨本自蟾蜍之魄三危莫比殊非沆  
瀣之英至道自元而兆醴泉因地而生原夫月麗於天水  
習乎坎物有時而出故方諸而夜呈事有朕而因故陰靈  
而下感大滿若沖其來不窮風塵莫染其真質天地不隔

其幽通況國家崇儀祔祀薦敬旻穹方欲行古道稽淳風  
客有賦明水之事敢聞之於闕宮

李宗和

宗和貞元九年進士

平權衡賦

以晝夜平分鈞  
銖取則爲韻

王者統四時均五則彼權衡之爲準驗陰陽之不忒鈞深  
致遠忝累於焉靡差稱物平施晷度由之斯得惟權也分  
其重惟衡也取其平明乎國經固懸茲以垂範掌乎天秩  
如用茲而永貞衡任權以鈞物權資衡以作程故一人體

之以清萬國萬國仰之而庶政以成當其元鳥司分疇人  
敬授既量諸夕又測其晝盈虛氣等何藉於土圭日夜時  
分已傳於玉漏莫不同度量以應其時平權衡以叶其候  
苟順氣以頒節實從時而不謬其功斯博其道式孚諒同  
均於遠近故不失於錙銖俾稱物者守之無易掄材者持  
之罔逾皇矣我君康哉神化萬方取則自得於均平二氣  
尚分無愆於晝夜不然者何以佐璿樞之斟酌調元氣以  
綢繆申乎舊章孰似權衡之大匪無同異所紀春秋之分  
齊其重輕等其規矩豈鈞銖之是待在繩準而有取固將

平邦國亦以敘彝倫七政惟齊有合乎應天之運百工咸  
賴實資乎秉國之鈞宜其平域中而齊律度貞天下而利  
黎人惟正直可法惟中平可均夫如是則權衡者蓋亦考  
茲義而是遵

陳佑

佑貞元九年進士爲淄青節度副大使李師道寮屬師道  
叛佑抗節忤賊被囚

平權衡賦

以晝夜平分鈞  
銖取則爲韻

俾民不迷茲器惟則行之而萬象正動之而天下直一人

不宰命任權者必公百辟以孚在持衡者守德此蓋國之  
恆準教以順行雖因時以考正乃假人而後成權之垂知  
俯下而斯重衡之正乃得一以至貞忠以自勝直哉惟清  
物無偏以表德器守公而作程動必推移佐璿璣而克正  
靜無偃仰若泰階之既平懿夫衡之誠懸德乃是茂秉中  
正以不忒在毫釐而何謬眾星分列若厯厯以拱辰一權  
下臨正亭亭而當晝斯斟酌之所以俾名實以相副者也  
爾其觀象取則其數可陳積而成重銖以和鈞稱物平施  
則其道無極從時利用乃有命惟新既審度而攸準夫何



患乎不均安則無傾正以順化四時行令必因其陰陽一德奉天諒貞夫日夜是知分寸相生成乎象盈虛有準觀夫文因黃鐘以起數應元鳥之司分爾乃七政允修五常斯覩爲時德也誠金義而木仁爲器法焉乃左旋而右矩旣輕重之必審雖微細而待取平之爲美曲逆終作漢臣中以見稱伊尹是爲殷輔茲乃衡之爲道也可大權之爲義也斯乎繩從則正德不可誣動不欺於累黍用有識於分銖若夫求平之至者執中之謂乎

陳左流

左流

英華注總目作九流

貞元十二年進士

進善旌賦

以設之通衢俾人進善爲韻

彼旌子子今五達之中進善爲名今求善爲功狀峒亭以  
戴日勢聳擢以凌空王者所以開讜諫之路作耳目之聰  
故帝堯設之道由此達洎我唐建也化乃斯通觀其迴立  
長衢孤標數仞麗晴天以獨出抗高閣而爭峻體惟能正  
俾止惡而來觀影則不虧使言善而思進莫非明主求臣  
願聞所陳期乎啟沃之佐想夫股肱之人由是標格寰中  
萬姓瞻之以爲準高居物外九重隔之以爲臬至乃不傾

不危持堅孤絕非虹蜺之光欲拖豈日月之明能揭故邦  
無道則我斯廢邦有道則我斯設彼書謗之木安可與齊  
承露之盤何能並列吾君庶政允釐獻納是思多聞得賢  
之頌每詠補袞之詩猶恐化理未洽俊乂尚遺而彼士則  
可招矣在斯旌故宜立之且夫爲干者其功尠爲旌者其  
利淺曷若當天下之用進海內之善揄揚不倦道已盛於  
方今正直長存事足昭於古典况登於睿鑑旌之通衢人  
則是仰物豈能踰謂善建者手不可拔豈有力者負之能  
趨是知昔之設旌也其美如彼今之設旌也其美如此君

若好善士皆可俾士有願歌乎聖德庶無慙於末技

陶拱

拱貞元中進士

天晴景星見賦

以有道之邦德  
星昭見爲韻

我皇以化洽四夷德應昌期能使嘉祥昭於國典景星耀  
於天維豈徒呈光芒而出矣遇精彩而見之於時元宵正  
清白日初匿爛景星之效質絢佳氣以競色起青方者縈  
瑞彩以葱龍發赤位者統祥光而翕艷比懷珠而其狀匪  
異等抱珥而其儀不忒懿吐黃以爭光矧聚三而表德莫

不熒煌於碧漢焜耀於青霄照下土而乍朗掩繁星而自  
昭或半虧其形類蟾魄而當晦朔或中虛其狀疑金環之  
在沱寥故德爲帝王之美作祥符之首信歷代之罕見旣  
今辰而方有稽往牒之隱見驗前經之休咎則天下和平  
域中殷阜佐朗月而其色惟盛臨安邦而其美不朽所以  
呈祥帝室效祉天庭表我皇之道泰彰我君之德馨豈比  
夫漢代稱奇空聞乎再中之日堯年紀異徒傳乎入昴之  
星而已乎則知天贊巨唐神依至道必著明於元象實垂  
曜於蒼昊叶妙理於上德表鴻休於天造不然者何爲效

靈莫匹具美無雙駭遠目於千里播英聲於萬邦是以綏厥黎庶垂諸史傳德非星而不著星非德而莫見蓋應運於英精亦叶時之靈變雖云瑞之眾祥之多未可比茲星之獨擅

五色比象賦

以車服有制示不徒設爲韻

聖人以王命之施官秩之設貴有品類賤有等列望之可辨非旌表而焉知出而自殊宜車服之有別於是招繪素之黨召彩筆之徒程亂目之眾色寫外物於百夫以侯伯子男之服爲飾以山龍華蟲之象爲殊莫不煌煌熒熒奕

奕煜煜青爲山兮崑崙而爭峻赤爲火兮艷熾而含煥粉

米以純白而璀璨宗彝以太元而黝儵絳

一作翬

而爲羽則

振迅而對飛暈而爲龍則跨騰而相逐蓋上古之禮制亦

當今之法服必謂美妙無盡精微有餘侔桂月之規縱麗

天而莫勝擬海藻之質雖摛文而不如實逞巧之無比信

取象而靡虛豈徒用別於涖職蓋亦或施於乘車懿其創

自於心成之在手或大之者不遺其美惡小之者不失其

妍醜此實權等於真宰功齊於妙有所以作國家之程式

辨王臣之印綬歷萬代之恆規經百王而共守不然者法

實紛糾制有允休何必假其彩色之炳煥於君子之衣裘  
合九章之物者則寫非五等之服者則不故往代垂模明  
君立制一則爵命之易辨一則制容之昭麗宜乎嘉其義  
重其事佐盛禮而罔易垂後代以永示信哉表德之爲良  
亦美作者之深意

滅裂禾賦

以爲功不至其  
報則然爲韻

昔子罕之秉權有封人之問焉以爲事不可以不敬物不  
可以不虔於是陳曩日耕大田予之於禾也其情易爾禾  
之於予也其狀悴然莫不報其素莫不答其先予知其意



遽變予志倍勤於他時盡力於茲地然後萌而密葉以翠  
契本心而罔違充所養而不匱故知生寡者其功未既實  
稀者其心不至苟矻矻以自強何芄芄之莫致是以人之  
從政士之飭躬僉黽勉而無極並陵兢而靡窮未有不課  
而名立未有不勤而道融所謂君子重其實貴其功以行  
之慎者比其盛以動之慢者譬其不惟盛也著美而可觀  
惟不也售能而誰取信乎鹵莽於庶績何異滅裂於南畝  
草旣在茲眾亦棄之雖有百廛莫得就而獲雖有萬頃焉  
可俯而持哂之者宜夫莞爾嘆之者何莫淒其則知惡必

由人善隨厥操往無不復施無不報雖斯言之細微實所  
諷之元奧足以將懲躁競用戒澆漓勸萬代之攸習勸烝  
人之所爲若然者功以之成利憑而得實輔政之義理亦  
勸學之典則在稼尚其如斯人乎曷不鑒之以隱惻

張復元

復元貞元中進士

太清宮觀紫極舞賦

以大樂與天地同和爲韻

樂者所以諧萬國舞者所以節八風故元宗致紫極之舞  
朝太清之宮俾觀舞以知德德以容備省風以作樂樂以

文同吾君纘道紀修祖功將有事以朝獻必斯舞之是崇  
方其一人庭羣后列位奉常執禮以恭命太樂陳儀而  
歲事望聖主以龍升見舞童而磨至舞之作矣應其度而  
展其容樂乃徧焉動於天而蟠於地其始也顧步齊進蹕  
蹕有序旣乍抑而復揚遂將墜而還舉始躡跡以盼睞每  
動容於取與陳器用之煌煌曳衣裳之楚楚觀乎俯仰迴  
旋乍離乍聯輕風颯然杳兮俯虹霓而觀列仙飄颻遷延  
或却或前清宮肅然儼兮若披雲霧而覩青天惟紫也取  
紫宮之清惟極也明太極之先用之則邦國之光備施之

則中和之氣宣徐而匪濁比上帝鈞天之樂靜而不過小  
園丘雲門之和亦何必持彼羽旌方聞乎得禮執其干戚  
然後爲止戈彼延陵空歎於象箭宋玉徒美其陽阿詎能  
合天地之大德調陰陽之大訛者乎洪惟我后遵祖爲大  
道其樂使萬物無不宣飾其容使兆人無不賴客有觀而  
作頌願播之於九域之外

呂鑄

鑄貞元十四年進士

萬年縣試金馬式賦

以漢朝鑄金爲  
名馬式爲韻

馬以行地致用式乃鑄金取規表騏驥以立則擬形容而可知合諸法象遵彼權奇卓爾趨姿想從革而乍見駭茲殊相疑軼塵而載馳毫髮盡似纖穠不差誠駿骨之倜儻亦巧心之云爲本其稱自前朝制於往漢金也者持堅剛之可久式也者驗逸異而有案形乃辨於千里功詎勞於萬鍛匪刻鵠之同科豈偶人而齊貫載鍊載精我馬是程武脊乍覩龍文可名星氣相合金光發明踈足不前如俟孫陽之顧望雲邈視寧殊注水之生向日而疑將奮影臨風而狀若長鳴曲盡其趣不愆於素寫逸態以全能制蘭

筋而巧附瞳雙鏡而可鑒觀兩月以合度謂天驥之呈材  
乃良金之所鑄取則不遠其象孔昭常矯矯以示眾特昂  
昂而建標騷裊在目飛黃立朝哂求市之三年終觀駿死  
無相肥於一概何慮駒跳所以稽乎驥德垂此作式指半  
漢以成規豈驚駘之可惑置於宮壺有待獻書之賢鑄以  
越銅載假伏波之力事與名遠理將意深寧俟造父之能  
馴驊驅可覲何必九方之善相驪牝獨尋等循形以觀影  
咸得駿於斯金故曰考茲術也選無違者可以斷臧否明  
取舍形分似是類別真假欲獻狀於國門期一中於名馬

玉書賦

以泥九百節皆說有神爲韻

上清中元聖立教存書示人以玉爲至精之寶喻道於強  
名之真使其復歸於本近取諸身保長生於氣母通不死  
於谷神妙哉靈訣虛皇之說清紫府之內瑕瑜不藏洗丹  
田之中瓊瑤比潔蓬萊有壽配金石姑射有顏如冰雪訝  
其與天地相終而莫知寒暑易節時所未喻茲焉在列我  
是以紀庭廬之位論藏府之官得之於此甚易求之於彼  
則難噓吹可以自審性命於焉內觀專氣致柔則順途而  
同轍適性任欲將背馳而走九五氣理於先後三關啟其

戶牖精粹自成於渣滓寵辱不驚於紛糾同美玉之韞匱  
我其善守以隋珠而彈雀爾於何有以取諸其懷致於道  
孔皆目可通於兩耀神相應於百骸乃知化自仙冊形爲  
真宅傳此希言服之無斁神明不見指象帝於虛無元覽  
可尋捧斯文而探蹟代所貴人受益不然何道德並經於  
五千靈仙自古而累百雖羽化之獨躋於國理而無睽用  
以修真則致虛抱一移於砥行乃立節思齊故鍊質者慕  
凌厲飛騰於碧落致身者以詩書禮樂爲丹梯俾克躬以  
服道乃潔已而如珪懸解上智之性指南下愚之迷客有



仰黃庭之祕錄空自嘆於塵泥

鄭俞

俞貞元十六年進士官長水縣令

性習相近遠賦

以君子之所  
慎焉爲韻

酌人心之善敗惟性習之所分習者物之遷以動爲主性  
者生之質以靜爲君運情有同於鎔鑄通志亦比夫耕耘  
或定心以純一或逐境而糾紛故定心者若疏源而自得  
逐境者猶理絲而又棼且物之惑人無窮人之徇物無已  
近之則歸於正性遠之則滅於天理雖真妄之多端諒御

用而由已至若習於所是則孟母之訓子其居也初闌闌之是鄰遂賈鬻而無恥及夫又徙於學徒示以墳史卒能振文行以標名鬱古今而播美豈不以性相近而習之至矣又若效之而非則壽陵之從師其故也等善行之無轍見大道之甚夷及夫邯鄲之學匍匐於茲旣所能之未盡終故步而莫追豈不以習相遠而性亦失之固宜人定其情物安其所苟欲遷性習以交喪易賢愚之攸處則舍於已而效於人學彌得而性彌阻述而莫息亦莫之禦是非乖理而亦徇未若襲愼而委順勿牽外以槩名在執中而

克慎欽若奧旨聞諸古先習之則善道可進守之則至理  
自全茲義也智所不染愚亦難遷儻中庸之可甄願斯焉  
而取焉

關構

構貞元中進士

日載中賦

以漢文帝時  
數如此爲韻

日以運行時維貞觀驗載中之照燭表一德之協贊至誠  
則感實所應於皇家偶聖必呈豈獨符於炎漢既退舍以  
迴薄又增明而輝煥且夫天地絪縕日月垂文始將傾而

復正願何鑒而不分當下委之碧落又上排之青雲經紀  
迴旋乃暉晶而射耀次舍中正則澄霽而銷氛何麗天以  
昭晰諒觸物而繽紛然而日乃陽德光於四裔陽爲君德  
配以上帝旣居中而有感亦臨下而罔替昔連珠而合璧  
或五色而四慧咸逐物而遷移并隨時而啟閉曷若此將  
肝而復昭昭無際則知陰陽冥通乃與仁聖符契徒觀其  
炫晃在茲氣肅風追合人君以乘時又觀其昭回繇邈霞  
張雪駁美嘉祥之欲數時以我旣再我則盈縮而自持時  
以我當中我則清明而不濁旣照臨於率土信叶和而反

朴夫日也變動不居周流六虛天垂象以咸若精可貫而  
皎如旣匪虧焉比皇明以無極斯呈瑞也諒至化之有餘  
且神功而不測乃駐晷其實徐所謂懸鑒在彼觀光由是  
仰大明之載中知積清而率俾因徵今以賦事諒舍彼而  
取此

徐復

復元和初官太常博士

駁李巽擬相國贈尚書右僕射鄭珣瑜諡議

鄭珣瑜令德清規坐鎮風俗理人而善政浹洽作相而謀

猷密勿其終始事跡當時罕儔所以表賢易名實曰文獻  
夫文者煥乎大行獻者軒然高名今而襲之厥有經義亦  
猶貞惠文子累數其功至於再三以勸事君者今奉駁議  
議其無進拔無是非無賑施無謬諤且曰二字之諡非三  
代兩漢事愚以爲巽之駁所謂進拔者豈不推擇羣萃致  
之於庭乎珣瑜往司銓衡暨當鈞軸流品式敘英髦在朝  
若無獎拔之明則何以至此但如來議寡言慎行故其端  
兆不可得而窺也當先朝之日上體不平姦臣王叔文招  
權作朋將害於國其視丞相如無也輕詣相府不循舊章

珣瑜意雖能誅力固不足移疾高謝萬情所歸則是非之明孰大於此夫所謂賑施者在禮家施不及國賢人君子廣愛爲心莫不開稱物之源布厚生之政曩者恤災患免逋租亦旣當之矣其於篤親庇族衣無常主踐名教者誰則不行若以分孤寡之資同於賑施則珣瑜所羞言也奚謂無哉至如謫謫匪躬前議已書其微婉矣旣承高論敢不指明德宗季年李實爲京兆尹殊恩晝接貴幸無比而實以羨餘稱貸莫之敢非珣瑜衆詰所繇上陳利害且曰取於人而未酬其直焉得有餘是其言不可謂之無謬謬

矣伏以國朝宰輔諡文而兼字者代有人焉故房元齡諡  
曰文昭狄仁傑諡曰文惠魏徵陸象先蘇瓌宋璟張說崔  
祐甫並諡曰文貞劉仁軌劉幽求姚元崇裴耀卿張九齡  
並諡曰文獻李元絃韓休並曰文忠薛元超曰文懿盧懷  
慎曰文成蘇頲曰文憲楊綰曰文簡其餘不可悉數若以  
文包美不宜以他字配之則房元齡狄仁傑以降昭惠貞  
獻忠懿成簡皆不得正矣我唐聲名文物二百年更閱羣  
才發揮王度豈擬名之典獨未得中邪不然何輕沮之爲  
駁正所設但當論諡之當否不宜詰字之多少苟有不當



雖一字可乎若皆允宜雖二字何害如韋巨源附會兇黨  
李北海奪其嘉名所言至公人則悅服今旣曰賢相而又  
非之君子於其言豈得苟而已乎若曰二字非三代兩漢  
之規則又異乎愚所學者矣夫威烈愼靚周王之諡也文  
終文成漢祖之佐命也霍光爲宣成孔光爲簡烈中代之  
勳德也劉寬爲昭烈楊賜爲文烈東都之鼎臣也安謂其  
無二字哉况文之爲名其義多矣有經緯天地焉有忠信  
節禮焉有寬立不懾堅強不暴焉有敏而好學不恥下問  
焉夫匪一端各有所當若皆西伯季孫之德然後可稱文

則魯侯與文伯歎之類皆不爲文矣故誅諡之制因時旌  
別前狀議珣瑜之行曰爲一代之名臣斯其旨歟謹上采  
禮經旁觀舊史參諸國典以定二名請依前諡曰文獻

